



Gabinete Wever - Croes II

ISLAONLINE


Noticia di Gobierno

2023

Diabierna 10 November 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Den cuadro di e bishita di Prinses Beatrix ARUBA TA YAMA BON BINI NA PRINSES BEATRIX



Diahuebs merdia, Prome Minister Evelyn Wever- Croes hunto cu Gobernador di Aruba, sr. Alfonso Boekhoudt, y sra. Hellen van der Wal di Dutch Caribbean Nature Alliance (DCNA), tabata presente na Aeropuerto Internacional Reina Beatrix, pa duna bon bini na Prinses Beatrix, cu riba invitacion di DCNA, lo ta na Aruba pa un bishita cortico. Durante su bishita, Prinses Beatrix lo asisti na un congreso na Universidad di Aruba, organisa pa DCNA, riba e tema di naturalesa.

Riba su propio iniciativa, Prinses Beatrix lo bishita Neptalie Henriquez Park, cu ta un speeltuín cu ta wordo remodela, hunto cu e fundacion Hulandes Jantje Beton. E fundacion aki, tin un iniciativa pa drecha varios speeltuín den e islanan Hulandes den Caribe, y pa e motibo aki, Prinses Beatrix lo bishita e speeltuín pa admira con bunita e ta kedando. Un otro proyecto cu Prinses Beatrix lo bishita durante su estadia cortico, ta telefon pa Hubentud, cu ta un proyecto cu e tin hopi cerca di su curason. Telefon pa Hubentud no solamente ta yuda aki na Aruba, pero tambe otro islanan den Caribe.

Finalmente, Diabierna mainta, Prinses Beatrix lo ta presente na Universidad di Aruba pa e congreso organisa pa DCNA,



riba e tema di naturalesa. Prome Minister a indica, cu aunke e bishita di Prinses Beatrix, no ta uno oficial, nan a duna un caluroso bon bini. "Aruba semper tabata tin un luga special den curason di Prinses Beatrix, y ela indica esaki bisando mi persona cu e ta contento di ta bek na Aruba, pa wak con e isla ta desaroyando despues di un par di aña cu e no a bin mas. Nos ta duna Prinses Beatrix un bon bini na Aruba, y spera cu su bishita cortico na nos dushi isla, ta uno fructifero" Prome Minister a expresa.



MINISTER URSELL ARENDS HUNTO CU PRINSES BEATRIX A WORDO INVITA PA PRESENCIA E PROYECTO EXITOSO DI REINTRODUCCION DI LORA NA ARUBA

Diabierna mainta Minister Arends tabata tin e honor pa acompaña Su Altesa Prinses Beatrix na e proyecto di Fundacion Parke Nacional Aruba y siña mas ariba e reintroduccion di lora na Aruba.

Lora ta un parha endemico, pero ya pa varios aña no por haya nan mas den nos naturalesa. E proyecto pa reintroduci loranan lo percura pa unabes mas nos por gosa di e parhanan aki den Aruba su naturalesa.

E proyecto ta un ehempel di colaboracion entre Aruba y Boneiro unda intercambio di conocimiento y esfuersonan entre esnan envolvi pa logra un proyecto exitoso. Trahando hunto por amplifica nos logronan na beneficio di nos comunidad y nos herencia natural.

FPNA, como entidad encarga di e campaña di coscientisacion y educacion na e comunidad di Aruba ariba Lora, ta hunga un rol vital. Nan trabou ta asegura cu tur persona ta compronde e importancia di nan rol pa e proteccion di nos parha nativo. Cada ciudadano por contribui na mantencion di nos herencia natural, y tur e tesoronan cu nos naturalesa ta ofrece.

Pabien na e ekipo di Fundacion Parke Nacional Arikok pa nan esfuerso destaca y dedicacion pa haci e proyecto un realidad. Nan trabou ta representa un paso importante pa recupera nos patrimonio natural y ta demostra nan compromiso na nos flora y fauna. Pronto, ful Aruba lo por celebra e logro inmenso aki pa nos Pais!





MINISTER WEVER DI BISHITA NA COLEGIO CONRADO CORONEL

Diaranson 8 di november, scol basico Colegio Conrado Coronel na Morgenster a ricibi bishita di Minister Geoffrey Wever. E mandatario a tene un encuentro cu e muchanan di 6e klas. E obhetivo principal tabata pa discuti y conscientisa e hobennan tocante e importancia di desaroyo sostenibel y con nan mes por contribui na un futuro mas sostenibel pa e proximo generacionnan.

Durante e bishita, Minister Wever a comparti su vision y pensamentonan tocante desaroyo sostenibel, enfocando riba areanan manera conservacion di medio ambiente, uso responsabel di recursonan natural y promocion di tecnologianan limpi. El a pone enfasis riba e papel crucial cu e muchannan mes por hiba den e lucha contra cambionan climatico y otro desafionan medioambiental.

E discusion tabata uno interactivo, unda cu e alumnonan a keda profundamente involvi. Nan a haci pregunta, comparti nan ideanan y expresa nan preocupacionnan tocante e futuro di nos isla y mundo. Minister Wever a elogia e entusiasmo y curiosidad di e hobennan. El a motivanan pa sigui busca conocimiento y pa compromete nan mes den accionnan concreto pa yuda proteha y mehora nos planeta.

Minister Wever a apunta e importancia di educacion tambe den e proceso di fomenta un mentalidad mas consciente y responsabel riba tema di medio ambiente. El a subraya cu educacion ta e yabi principal pa capacita e proximo generacionnan pa enfrenta e desafionan cu lo bin y pa nan por toma decisionnan informa y sostenibel.

Na final di e encuentro, tanto e alumnonan como e docente a expresa nan gratitud pa e oportunidad di por a interactua directamente cu Minister Wever y pa e conocimiento valioso cu nan a ricibi. Esaki sin duda ta un paso significativo den e direccion corecto. E conversacion aki ta e comienso di un dialogo continuo, cu colaboracion entre gobierno y e comunidad educativo, pa logra un futuro mas sostenibel pa un y tur.





MINISTER ENDY CROES A ASISTI NA PREMIER DI PELICULA OTRO BANDA DI E CAM NA THE MOVIES IMAX NA GLORIA

E pelicula ta forma parti di e campaña di conscientisacion Habri bo Wowo pa crea consciencia pa traficacion y contrabanda di hende



Dia 18 di october cu ta Dia Nacional Contra Traficacion di Hende, Minister di Enseñansa y Deporte Endy Croes a asisti na premier di e pelicula Otro Banda di e Cam na The Movies IMAX na Gloria Aruba. E pelicula Otro Banda di e Cam ta continuacion di e pelicula Otro Banda di Laman y ta parti di e campaña di conscientisacion Habri bo Wowo cu a lansa na mei di aña 2021. Den Otro Banda di Cam ta ilustra traficacion di hende den forma moderno, unda cu un traficado ta manipula, gaña, y forsa un persona pa haci actonan sexual dilanti camara.

E pelicula aki ta produci pa e compania local Freeway Agency, bou encargo di Coordinatiecentrum Mensenhandel Mensensmokkel Aruba (CMMA) pa trece conscientisacion riba e fenomeno di traficacion y contrabanda di hende. Minister Endy Croes ta expresa cu esaki ta tremendo proyecto y sigur un tremendo mensahe pa trece consciencia den nos comunidad tocante traficacion y contrabanda di hende. Esaki ta un problema global y e ta pasa na Aruba tambe. Gabinete Wever-Croes II ta comprometi pa combati e crimen aki y p'esey ta ta vital importancia pa nos trata e tema aki.





Minister Endy Croes:

**E APERTURA DI OPEN BEACH TENNIS 2023
TA DIADOMINGO, 12 DI NOVEMBER NA
EX BUSHIRI BEACH HOTEL**

**E di diestres (13) edicion di Aruba Open Beach Tennis ta inicia 12 di
november y ta culmina 19 di november proximo**



Diahuebs atardi, durante conferencia di prensa Minister di Enseñansa y Deporte Endy Croes hunto cu e organizado di e tremendo torneo internacional Aruba Open Beach Tennis, Sr. Sjoerd de Vries a anuncia cu e di diestres (13) edicion di Aruba Open Beach Tennis ta inicia 12 di november y ta culmina 19 di november proximo. Tambe presente den e ocasion aki tabata Sra. Tita Iglesias di Aruba Tourism Authority (ATA), representante di Caribbean Mercantile Bank (CMB) Sr. Ilán Lopez y atleta local Sra. Maria Buuts y Sr. Wayne Tromp. Aruba Open Beach Tennis ta e torneo deportivo di mas grandi di Aruba y ta patrocina pa Aruba Tourism Authority (ATA) cu ayudo di Gobierno di Aruba, diferente departamento di gobierno y stakeholder cu ta contribui pa haci e torneo aki posibel.

E evento ta premira di ta hopi grandi, cu alrededor di 1200 atleta participando di 40 diferente pais y un total di 70 mil US\$ na premio. Tambe, lo tin un grupo di referee profesional di Italia na Aruba pa dirigi e torneo aki. E aña aki a traha un tribuna mas grandi, unda por aloca mas di 700 hende. Tin un total di 36 cancha y ta spera di tin rond di 3 mil partido di diferente categoria, entre otro, pro, avansa, intermedio y principiante. Minister Endy Croes ta felicita Sr. Sjoerd de Vries, ATA, tur stakeholder y Gobierno di Aruba cu a contribui den gran evento



deportivo aki. Pueblo di Aruba ta cordialmente invita pa bin apoya nos atletanan durante e siman di torneo di Aruba Open Beach Tennis 2023. Minister Endy Croes ta desea tur atleta hopi exito! Cu deseo, disciplina, dedicacion y determinacion ta logra.



Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecimiento y desaroyo di un sociedad.